

KEMATIAN ORANG ASLI KUALA KOH

Kem PLKN jadi pusat pemindahan sementara

➔ Penempatan 50 suku Batek selepas rawatan di hospital

Oleh Nor Fazlina
Abdul Rahim dan
Mohd Zulkifli Zainuddin
bhnews@nstp.com.my

► Gua Musang

Kem Program Latihan Khidmat Negara (PLKN) Etnobotani di sini, dijadikan pusat pemindahan sementara penduduk Orang Asli suku Batek dari Kuala Koh yang selesai mendapatkan rawatan di hospital.

Timbalan Perdana Menteri, Datuk Seri Dr Wan Azizah Wan Ismail, berkata dianggarkan 50 Orang Asli ditempatkan di pusat pemindahan itu yang mampu menampung 400 orang.

Beliau berkata, buat masa ini, situasi kebajikan Orang Asli Kuala Koh terkawal, namun orang awam tidak dibenarkan masuk ke penempatan terbabit, termasuk menyampaikan sumbangan selepas polis mengisytiharkan kawasan itu zon merah.

"Kerajaan faham keprihatinan masyarakat dan pertubuhan bukan kerajaan (NGO) untuk mem-

bantu, namun atas faktor keselamatan mereka tidak dibenarkan menyalurkan sendiri bantuan," katanya selepas meninjau dan mendengar taklimat di pusat operasi FELDA Aring, di sini semalam.

Dr Wan Azizah berkata, orang ramai boleh menyalurkan bantuan melalui Pusat Pengumpulan Bantuan Awam, Pusat Kawalan Tempat Kejadian (PKTK) FELDA Aring 10 atau Jabatan Kebajikan Masyarakat (JKM), Gua Musang.

"Antara barang keperluan disarankan dan boleh disumbang, termasuk makanan mentah, minuman bersih, kit kebersihan, selimut, kain pelikat, selipar serta ubat kutu," katanya yang juga Menteri Pembangunan Wanita, Keluarga dan Masyarakat.

Pertimbang pampasan

Mengenai pampasan kepada keluarga penduduk yang meninggal dunia, beliau berkata, ia akan dipertimbangkan, manakala bantuan lain seperti pendidikan kesihatan, kaunseling diberikan kepada penduduk dan petugas bagi mengurangkan te-



[FOTO SYAMSI SUHAIMI /BH]

Dr Wan Azizah menyampaikan sumbangan kepada wakil Orang Asli Kuala Koh di FELDA Aring 10, Gua Musang, semalam.

kanan dan keresahan.

Sementara itu, Dr Wan Azizah berkata, ujian sampel air diambil Jabatan Alam Sekitar (JAS) berdekatan lombong bijih mangan dan tadahan air bukit di Kuala Koh yang dikeluarkan Jabatan Kimia, mendapati kualitinya mematuhi Standard Kualiti Air Minum Kebangsaan bagi air mentah.

Sehubungan itu, katanya, Kementerian Kesihatan masih giat menjalankan siasatan dan ujian makmal bagi mengenal pasti punca utama jangkitan penyakit yang menyebabkan 14 penduduk Orang Asli di situ meninggal dunia.

“Siasatan JAS mengesahkan tiada pelepasan sisa dari lombong mangan di FELDA Aring 10 yang terletak tiga kilometer dari kampung Orang Asli Kuala Koh. Justeru, Kementerian Kesihatan masih giat menjalankan siasatan dan ujian makmal bagi mengenal pasti punca utama jangkitan penyakit.

“Keputusan ujian makmal jangka diperolehi tiga hari selepas mengambil sampel ujian daripada mangsa yang sakit dan meninggal dunia. Keadaan sedikit sulit kerana

jenazah dikebumikan mengikut adat mereka, mayat diletakkan di atas pokok dan ada yang jatuh dilarikan binatang buas,” katanya.

Mangan adalah logam bersifat rapuh, warna kelabu keputih-putihan serta digunakan dalam perusahaan membuat keluli, kaca dan produk berkaitan.

Dr Wan Azizah berkata, pelbagai agensi kerajaan perlu mengenal pasti punca kematian kerana apa yang berlaku tidak pernah melanda penempatan Orang Asli sebelum ini sehingga membabitkan kematian mendadak.

Sampel dikaji untuk kenal pasti virus

“Hasil pemeriksaan Kementerian Kesihatan terhadap Orang Asli yang meninggal dunia dan menerima rawatan mendapati mereka negatif tibi, kencing tikus serta parasit.

Mungkin virus itu yang belum dikenal pasti sudah merebak dalam kehidupan budaya mereka sejak sekian lama,” katanya.

Sementara itu, Pengarah Kesihatan Kelantan, Dr Zaini Hussin,

berkata sampel daripada mangsa yang meninggal dunia dan dirawat sudah dihantar ke Jabatan Kimia, Institut Penyelidikan Perubatan di Kuala Lumpur; Makmal Kesihatan Sungai Buloh serta Makmal Kesihatan Awam di Kota Bharu.

“Ia untuk mengenal pasti punca dan jenis virus yang menyebabkan 14 kematian itu. Penyakit dikatakan misteri ini tidak akan menjadi misteri lagi kerana kita akan tunggu keputusan dari makmal Institut Penyelidikan Perubatan Sungai Buloh dalam masa dua hari,” katanya.

Secara keseluruhan, beliau yang ditemui media semalam, berkata keadaan wabak yang menyerang penduduk buat masa ini menunjukkan aliran penurunan dan pesakit juga semakin sembuh.

Ketika ini, katanya, 49 penduduk masih dirawat di Hospital Gua Musang dan Hospital Kuala Krai (HKK) serta lima di Unit Rawatan Rapi (ICU) membabitkan seorang di Hospital Raja Perempuan Zainab II (HRPZII) dan empat lagi di HKK.